

Forsætisnefnd

Endurskoðun reglna um skráningu á fjárhagslegum hagsmunum borgarfulltrúa og trúnaðarstörfum utan borgarstjórnar.

Vísað er til fyrri bréfa skrifstofu borgarstjórnar til forsætisnefndar, um sama efni, einkum bréfs dags. 25. september þar sem drög að reglum um skráningu á fjárhagslegum hagsmunum borgarfulltrúa og trúnaðarstörfum utan borgarstjórnar voru uppfærði samræmi við ábendingar Persónuverndar. Það var niðurstaða Persónuverndar að ekkert sé því til fyrirstöðu að bjóða upp á valkvæða skráningu fjárhagslegra hagsmuna borgarfulltrúa sem farið geti fram á grundvelli samþykkis hins skráða sbr. 1. tölulið 9. gr. laga nr. 90/201, sbr einnig a-lið 1. mgr. 6. reglugerðar (ESB) 2016/679. Jafnframt hefur nú verið bætt inn ákvæði þar sem vísað er til nýrra laga um skilgreiningar á raunverulegum eigendum sbr. ákvæði laga um skráningu raunverulegra eigenda nr. 82/2019, við mat á því hvort skrá skuli fjárhagslega hagsmuni borgarfulltrúa í félagi sem hann á sjálfur eða er meðeigandi í.

Er mælt með því að forsætisnefnd vísi reglunum til staðfestingar borgarstjórnar ef þær teljast nú tilbúnar til afgreiðslu eftir breytingarnar.

Helga Björk Laxdal
skrifstofustjóri borgarstjórnar

**Reglur um skráningu
á fjárhagslegum hagsmunum borgarfulltrúa
og trúnaðarstörfum utan borgarstjórnar**

1. gr.

Tilgangur.

Reglum þessum er ætlað að veita almenningi upplýsingar um fjárhagslega hagsmuni borgarfulltrúa og varaborgarfulltrúa hjá Reykjavíkurborg og trúnaðarstörf þeirra utan borgarstjórnar og þar með auka gagnsæi í störfum borgarstjórnar Reykjavíkur.

2. gr.

Skráning upplýsinga..

Skráning samkvæmt reglum þessum er valkvæð og skulu þeir borgarfulltrúar og varaborgarfulltrúar (hér eftir borgarfulltrúar) sem kjósa að skrá hagsmuni sína í samræmi við reglurnar, innan mánaðar frá því að borgarstjórn kemur saman eftir kosningar, gera opinberlega grein fyrir fjárhagslegum hagsmunum sínum og trúnaðarstörfum utan borgarstjórnar.

Þeir borgarfulltrúar sem kjósa að skrá ekki hagsmuni sína upplýsa skrifstofu borgarstjórnar um það og ná ákvæði regnanna ekki til þeirra.

Þeir borgarfulltrúar sem kjósa að skrá sig skuldbinda sig til að viðhalda skráningu sinni með því að skrá nýjar upplýsingar og viðbótarupplýsingar innan mánaðar frá því að þær liggja fyrir.

3. gr.

Skrá um fjárhagslega hagsmuni og trúnaðarstörf.

Skrifstofa borgarstjórnar skal halda skrá, og birta á vef Reykjavíkurborgar, um fjárhagslega hagsmuni borgarfulltrúa svo og um trúnaðarstörf þeirra utan borgarstjórnar.

Skráin er byggð á upplýsingum sem þeir borgarfulltrúar sem kjósa að skrá hagsmuni sína, láta sjálfir í té og senda inn á rafrænan hátt. Innfærslan felur í sér staðfestingu á skráðum upplýsingum og að nýjar upplýsingar verði færðar inn eftir því sem aðstæður breytast.

Við skráningu upplýsinga skal fylgja að fullu fyrirmælum þessara reglna. Ekki er heimilt að taka inn í skrána upplýsingar sem falla utan regnanna.

4. gr.

Fjárhagslegir hagsmunir.

Eftirfarandi fjárhagslegir hagsmunir skulu skráðir:

1. Launuð störf og tekjumyndandi starfsemi.

a. Launuð stjórnarseta í einkareknum eða opinberum félögum. Staða og félag skulu skráð.

b. Launað starf eða verkefni (annað en launað starf sem borgarfulltrúi). Starfsheiti og nafn vinnuveitanda eða verkkaupa skulu skráð.

c. Starfsemi sem er rekin samhliða starfi borgarfulltrúa hjá Reykjavíkurborg og er tekjumyndandi fyrir hann eða félag sem hann á sjálfur eða er meðeigandi í. Tegund starfsemi skal skráð.

2. Fjárhagslegur stuðningur, gjafir, utanlandsferðir og eftirgjöf eftirstöðva skuldar.

- a. Fjárframlag eða annar fjárhagslegur stuðningur frá innlendum og erlendum lögaðilum og einstaklingum, þar á meðal stuðningur í formi skrifstofuaðstöðu eða hliðstæðrar þjónustu, sem fellur utan þess stuðnings sem Reykjavíkurborg eða stjórnmálasamtök borgarfulltrúans lætur í té, og verðgildi stuðnings nemur meira en 50 þús. kr. á ári. Enn fremur skal skráður fjárhagslegur stuðningur í formi afsláttar af markaðsverði og annars konar ívilnunar að verðmæti meira en 50 þús. kr. sem ætla má að sé veittur vegna stöðu borgarfulltrúa hjá Reykjavíkurborg. Skráð skal hver veitir stuðninginn og hvers eðlis hann er.
- b. Gjöf frá innlendum og erlendum lögaðilum og einstaklingum þegar áætla verður verðmæti hennar yfir 50 þús. kr. og að gjöfin sé veitt vegna stöðu kjörins fulltrúa hjá Reykjavíkurborg. Skrá skal nafn þess sem gefur, tilefni gjafar, hvers kyns hún er og hvenær hún er látin í té.
- c. Ferðir og heimsóknir innan lands og utan sem geta tengst stöðu borgarfulltrúa og útgjöldin eru ekki að öllu leyti greidd af Reykjavíkurborg, stjórnmálasamtökum borgarfulltrúans eða honum sjálfum. Skrá skal hver stóð undir útgjöldum ferðar, tímabil hennar og heiti áfangastaða.
- d. Eftirgjöf eftirstöðva skuldar og ívilnandi breytingar á skilmálum sammings við lánardrottinn. Skrá skal lánardrottinn og eðli sammingsins.

3. Eignir.

- a. Fasteign sem er að einum þriðja eða meira í eigu borgarfulltrúa eða félags sem hann á fjórðungshlut í eða meira, annað en húsnæði til eigin nota fyrir borgarfulltrúa og fjölskyldu hans og lóðarréttindi undir slíkt húsnæði. Skrá skal heiti landareignar og staðsetningu fasteignar.
- b. Heiti félags eða sparisjóðs sem borgarfulltrúi á hlut í og fer yfir einhver eftirtalinna viðmiða:
 1. Verðmæti hlutar nemur að markaðsverði meira en 1 milljón króna miðað við 31. desember ár hvert.
 2. Hlutur nemur 1% eða meira í félagi eða sparisjóði þar sem eignir í árslok eru 230 milljónir króna eða meira eða rekstrartekjur 460 milljóna króna eða meira.
 3. Hlutur nemur 25% eða meira af hlutafé eða stofnfé félags eða sparisjóðs.
- c. Heiti sjálfseignarstofnunar í atvinnurekstri, sbr. 3. gr. laga nr. 33/1999, um sjálfseignarstofnanir sem stunda atvinnurekstur, sem kjörinn fulltrúi á hlut í og fer yfir einhver þeirra viðmiða sem talin eru í b-lið.

4. Skuldir.

Skrá skal skuldir, sjálfskuldarábyrgðir og aðrar ábyrgðir, sem tengdar eru rekstri fasteignar eða atvinnurekstri félaga, sparisjóða eða sjálfseignarstofnana, sbr. 3. tölul. Ekki skal skrá fjárhæð skuldar eða skuldir eða ábyrgðir sem stofnað er til í öðrum tilgangi, svo

sem vegna kaupa á íbúðarhúsnæði til eigin nota eða bifreið til eigin nota, námslána eða annarra ráðstafana sem ekki tengjast atvinnurekstri. Jafnframt skal skrá tegund skuldar eða ábyrgðar og skuldareiganda.

5. Samkomulag við fyrrverandi eða verðandi vinnuveitanda.

a. Samkomulag við fyrrverandi vinnuveitanda sem er fjárhagslegs eðlis, þar á meðal samkomulag um orlof, launalaust leyfi, áframhaldandi launagreiðslur eða fríðindi, lífeyrisréttindi og ámóta meðan setið er í borgarstjórn. Skrá skal gerð samkomulags og nafn vinnuveitanda.

b. Samkomulag við framtíðarvinnuveitanda um ráðningu, óháð því að ráðningin taki fyrst gildi eftir að kjörinn fulltrúi hverfur af vettvangi borgarstjórnar. Skrá skal gerð samkomulags og nafn vinnuveitanda.

Ekki skal skrá fjárhæð eða verðgildi þeirra þátta sem tilgreindir eru.

Við mat á því hvort skrá skuli fjárhagslega hagsmuni borgarfulltrúa í félagi sem hann á sjálfur eða er meðeigandi í skal miða við skilgreiningu á raunverulegum eiganda sbr. ákvæði laga um skráningu raunverulegra eigenda nr. 82/2019.

5. gr.

Trúnaðarstörf utan borgarstjórnar.

Skráðar skulu upplýsingar um stjórnarsetu og önnur trúnaðarstörf fyrir hagsmunasamtök, opinberar stofnanir, sveitarfélög og félög önnur en stjórn málasamtök óháð því hvort þessi störf eru launuð eða ekki. Skrá skal nafn félags, hagsmunasamtaka, stofnunar eða sveitarfélags og eðli trúnaðarstarfs.

6. gr.

Skráning upplýsinga.

Þeir borgarfulltrúar sem kjósa að skrá hagsmuni sína, skrá upplýsingar á rafrænan hátt innan mánaðar frá því að nýkjörin borgarstjórn tekur sæti. Skráningarblað sem notað er skal staðfest af forsætisnefnd.

Nýjar upplýsingar skv. 4. og 5. gr., þar með taldar upplýsingar um nýfengna hluti í félögum eða breytingar á áður skráðum upplýsingum, skulu skráðar innan mánaðar eftir að upplýsingarnar liggja fyrir.

Þegar nýjar upplýsingar eru skráðar eða eldri upplýsingum er breytt skulu áður skráðar upplýsingar um hagsmuni borgarfulltrúa geymdar í skjalasafni skrifstofu borgarstjórnar. Nýjar eða breyttar upplýsingar skulu vera aðgengilegar á vef Reykjavíkurborgar innan 7 daga frá því að borgarfulltrúi hefur tilkynnt um skráningu þeirra. Upplýsingar skulu teknar úr birtingu á vef Reykjavíkurborgar þegar borgarfulltrúi lætur af störfum.

Skráning að loknum borgarstjórnarkosningum skal vera aðgengileg almenningi á vef Reykjavíkurborgar innan sjö virkra daga eftir að skráningarfræstur rennur út.

7. gr.

Skrifstofa borgarstjórnar.

Skrifstofa borgarstjórnar útbýr og sendir borgarfulltrúum leiðbeiningar um framkvæmd skráningarinnar, auk þess að veita almennar leiðbeiningar eftir því sem tilefni er til með aðkomu fjármálaskrifstofu, innri endurskoðanda og regluvarðar ef nauðsyn krefur.

Við upphaf kjörtímabils og við lok þess frests sem borgarfulltrúar hafa til þess að skrá hagsmuni sína, sbr. 1. mgr. 2. gr., skal skrifstofa borgarstjórnar vekja athygli borgarfulltrúa, á hagsmunaskráningunni og nauðsyn þess að viðhalda skránni samkvæmt reglum þessum.

Skrifstofa borgarstjórnar skal minna borgarfulltrúa á að viðhalda skráningu samkvæmt reglum þessum. Skal skrifstofan senda þeim sem reglurnar taka til tilkynningu þess efnis í janúar og júní ár hvert og þegar tilefni er til samkvæmt ákvörðun skrifstofustjóra borgarstjórnar.

Verkefnisstjóri á skrifstofu borgarstjórnar hefur umsjón með skráningunni og veitir aðstoð eftir því sem þörf er á.

8. gr.

Eftirfylgni.

Þeir borgarfulltrúar sem kjósa að skrá hagsmuni sína samkvæmt reglum þessum bera einir ábyrgð á skráningu fjárhagslegra hagsmuna sinna og trúnaðarstarfa utan borgarstjórnar.

Fái skrifstofa borgarstjórnar ábendingu um að borgarfulltrúi sem reglurnar taka til hafi ekki skráð hagsmuni sína réttilega eða að hann hafi ekki haldið skráningu þeirra við skal skrifstofan gera honum viðvart um slíkt.

Erindum vegna hagsmunaskráningar þeirra borgarfulltrúa sem skrá hagsmuni sína samkvæmt reglum þessum skal beint til forsætisnefndar.

9. gr.

Endurskoðun fjárhæða.

Forsætisnefnd skal við lok kjörtímabils borgarstjórnar leggja mat á hvort tilefni sé til að endurskoða viðmiðunarfjárhæðir í reglum þessum.

10. gr.

Gildistaka o.fl.

Reglur þessar, sem eru settar með vísan til 36. gr. samþykktar um stjórn Reykjavíkurborgar og fundarsköp borgarstjórnar koma í stað reglna frá 29. október 2009 um skráningu á fjárhagslegum hagsmunum borgarfulltrúa og trúnaðarstörfum utan borgarstjórnar.

Samþykkt í borgarstjórn X. X 2019.